

（四）谱式略述（初修贤振公）

老泉族谱后录约举苏氏七十有余世，所得传者仅七人，以为谱不立之过，亮哉斯言！至言其谱所由作，则惟断自高祖，论者往往隘之。夫身之自出，宜尊矣详矣，而族所由来，亦未可略，笃于近而遂忽乎远，后之人虽欲谄始迁之祖，其孰从而求之？

吾族自四祖避地以来，谱缺有间，历世十九，而今乃纠合纂修，则权舆可弗慎乎？爰是谨遵欧阳遗式，从源及流，但事在创始，务相联属，如祖行分自“士”字，即将“士”字以下五代一联叙毕，复从大房“有”字以下叙之，因而各房递叙，仍以五代一联之式，照上挨叙，罔敢或紊，后有续者，依一支清一支之式补叙，元元本本，开卷了然，斯亦不患其不可久矣。又谱系之后，无庸妄有记载。惟旧谱稿中，万万不可磨灭者，则只字无遗，盖肯堂肯构，前人实开其基，弃焉勿顾，岂得为余有后哉？第各房子孙，散处不一，有与闻其事而莫相往来者，如长房之在临湘；有经首事知会数次，而将前且却者，如我房之营田坪、莲花桥等处是也；有闻音踊跃、稽查来历、确凿不易，终不赴厥事者；有

僻处西蜀，虽闻音而不果来者；又有只隔数百里则犹不得音者；此皆未及登诸谱中。然既出自我祖四公之后，亦必详载某之子某、迁某处，非不惮烦也，敦本明伦，庶后来得有所据而重修，且令萍水相逢者，循流溯源，犹不至以途人相视，其老苏所谓孝悌之心，可以油然而生矣乎。夫坟墓山向与抚子承继之事，前序已悉，兹不赘。

渊公十九世孙吴昌杏村贤振九均氏盥手敬撰